

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

Broj: 01/1-26-Z/23

Kakanj, 28.02.2023. godine

Z A P I S N I K

**sa 26. redovne sjednice Općinskog vijeća održane 28.02.2023. godine (utorak)
u sali Općinskog vijeća sa početkom u 9:00 sati
(sažetak zapisnika)**

Predsjedavajući Općinskog vijeća Slaven Katičić je pozdravio prisutne i otvorio 26. redovnu sjednicu Općinskog vijeća.

Prije početka sjednice i utvrđivanja kvoruma svečanu izjavu je dao vijećnik Edin Šljivo (SDP BiH), a nakon prestanka mandata vijećniku Eldinu Mijoču (SDP BiH).

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Izudin Puščul, Omer Musić, Nerma Aliefendić, Safet Šahman, Mejrema Purišević, Mediha Mamela, Elvir Delibašić, Namir Talić, Adis Mrkonjić, Amar Selimović, Aldin Šljivo, Džemal Bečirhodžić i Izudin Hrusto (**naknadno pristupio**) (**SDA**)

Vinka Aletović, Miroslav Spasojević i Edin Šljivo (**SDP BiH**)

Mirsad Tursum, Zerina Kovač, Fakir Ajdinović i Sabit Čehajić (**S BiH**)

Dževdet Huskić, Marcela Ravlija i Branko Češljčić (**NS**)

Mugdin Gorak i Enver Merdić (**SBB BiH**)

Adnan Čobo i Armin Bašić (**DF**)

Slaven Katičić (**HDZ BiH**)

Mujo Fafulić (**nacionalna manjina**)

Odsutni vijećnici: Ahmed Begić (**SDP BiH**)

Predsjedavajući je konstatovao da je na sjednici u momentu prijave prisutno 28 vijećnika i vijećnica, te su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

Mirnes Bajtarević, općinski načelnik

Ferdo Mijač, sekretar Općinskog vijeća

Džihad Berbić, pomoćnik općinskog načelnika za finansije

Mirza Fazlić, pomoćnik općinskog načelnika za privredu, urbanizam i zaštitu okoline

Bahrudin Arnaut, pomoćnik općinskog načelnika za opću upravu radne i zajedničke poslove, lokalnu samoupravu i mjesne zajednice

Edin Aliefendić, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Nurudin Hrusto, pomoćnik općinskog načelnika za civilnu zaštitu

Mukades Delibašić, pomoćnik općinskog načelnika za imovinskopravne, geodetske poslove i katastar nekretnina

Zijad Neimarlija, direktor Zavoda za planiranje i izgradnju općine Kakanj

Mahir Sikira, savjetnik općinskog načelnika

Izjescioci, obrađivači, gosti

Muamer Čelebić, direktor JP „Grijanje“ d.o.o. Kakanj

Aldin Čatić, direktor Udruženja „Razvojni centar općine Kakanj“

Predstavnici medija

NTV IC Kakanj

Radio Kakanj

Kakanj Info

Napomene o radu Kolegija Općinskog vijeća

U pripremi 26. redovne sjednice Općinskoga vijeća, Kolegij Općinskog vijeća je 21.02.2023. godine, održao sjednicu na kojoj je razmatrao:

a) Vijećničku inicijativu Fakira Ajdinovića

Kolegij je Vijećničku inicijativu vijećnika Fakira Ajdinovića, u vezi izmjene i dopune Odluke o utvrđivanju naknada članovima upravnih i nadzornih odbora javnih ustanova („Službene novine Općine Kakanj“, broj: 1/13, 3/15 i 3/22) u dijelu koji se odnosi na naknade za predsjednike i članove upravnih i nadzornih odbora, uputio Općinskom vijeću na izjašnavanje.

b) Poziv OSCE-a za uvođenje/revidiranje etičkih kodeksa za izabrane zvaničnike

Poziv OSCE-a za uvođenje/revidiranje etičkih kodeksa za izabrane zvaničnike Kolegij je uputio Komisiji za Etički kodeks na razmatranje i očitovanje.

c) Zahtjev MZ Krševac

Zahtjev MZ Krševac Kolegij je uputio općinskom načelniku na razmatranje i očitovanje.

d) Zahtjev NGG Park prirode Trstionica i Boriva za pokretanje Inicijative za zakonsku zaštitu područja Trstionice i Borive

Zahtjev NGG Park prirode Trstionica i Boriva za pokretanje Inicijative za zakonsku zaštitu područja Trstionice i Borive Kolegij je uputio Službi za privredu, urbanizam i zaštitu okoliša kako bi od Ministarstva za prostorno uređenje, promet i komunikacije i zaštitu okoline ZDK zatražila očitovanje o ranije pokrenutoj inicijativi Općine Kakanj za zaštitu ovog područja.

e) Zahtjev NGG Park prirode Trstionica i Boriva za održavanje sastanka

Predsjedavajući je izvijestio Kolegij da je održao sastanak sa predstavnicima NGG i CCI 16.02.2023.godine.

f) Molba/ zahtjev MZ Kakanj II – mještani ulice Patriotske lige za proširenje mreže grijanja

Molbu/zahtjev Kolegij je primio k znanju obzirom da je isti upućen nadležnoj službi i načelniku.

g) Odgovor JU KSC na Zaključak Općinskog vijeća 01/1-24-K-1/23 od 23.01.2023. godine

Odgovor JU KSC na Zaključak Općinskog vijeća broj: 01/1-24-K-1/23 od 23.01.2023. godine, Kolegij je primio k znanju i prosljedio advokatu Ševali Demir.

Usvajanje zapisnika sa 25. redovne sjednice Općinskog vijeća

Sabit Čehajić: je iznio primjedbu na zapisnik i to u dijelu gdje je vijećnik Tursum (direktor Doma zdravlja) u usmenom odgovoru na vijećničko pitanje vijećnika Šahmana rekao da brnjičani krađu ugalj iz ambulante Brnjic, a što u zapisniku nije navedeno.

Mirsad Tursum: se osvrnuo na iznesenu primjedbu i rekao da nije tačno da je rekao da brnjičani kradu ugaj nabavljen za zagrijavanje ambulante u Brnjicu, nego je pitao vijećnika Šahmana ko krade ugaj iz te ambulante.

Predsjedavajući: je podsjetio da se sa sjednica radi sažetak zapisnika, a ne stenogram, te da je na audio snimku, koji je sastavni dio zapisnika, zabilježeno doslovno sve što je rečeno na sjednici.

Nakon diskusije zapisnik je usvojen sa 28 glasova ZA, bez glasova PROTIV i 1 glas UZDRŽAN.

Komentari na dostavljene odgovore na vijećnička pitanja

Nije bilo komentara na dostavljene odgovore na vijećnička pitanja.

Komentari na dostavljena mišljenja na vijećničke inicijative

Nije bilo komentara na dostavljena mišljenja na podnesene vijećničke inicijative.

Vijećnička pitanja

Dževdet Huskić: je postavio dva vijećnička pitanja. Prvo je da li JP „Vodokom“ planira postavljanje dodatnih kontejnera u gradu, s obzirom da postojeći broj kontejnera ne zadovoljava potrebe građana za odlaganjem smeća? Drugo pitanje je dokle se došlo sa discipliniranjem vijećnika i vijećnice Naše stranke i da li je vrijeme da se imenuju prijedlozi te stranke u komisije za ekologiju i mlade?

Armin Bašić: je postavio dva vijećnička pitanja. Prvo pitanje je zašto nikad nije riješen odvoza luga sa područja MZ Koprivnica, zbog čega su mještani primorani odlagati nesagoreni ugaj na nedozvoljene lokacije? Drugo je koje su ugovorene obaveze kupca, odnosno općine kao prodavca, kao posljedica nepoštivanja ugovorenog roka za početak radova na izgradnji pijace, ako se zna da je isti istekao?

Marcela Ravlija: je postavila dva vijećnička pitanja. Prvo je ima li JP „Grijanje“ plan smanjenja troškova, imajući u vidu da od ukupnih troškova Grijanja, na troškove toplotne energije odlazi 41%, dok 33% odlazi na troškove plaća, te u tom smislu ima li, i koji je plan smanjenja troškova u smislu organizacijskih promjena i uvođenja novih tehničkih rješenja koje bi za cilj imale poboljšnje usluga, zaustavljanje rasta cijena i poslovanje bez straha od odlaska u minus? Drugo pitanje je gdje i kako se planira potrošiti 470.000 KM iz Programa utroška namjenskih sredstava za zaštitu okoline Općine Kakanj za 2023. godinu, obzirom da se radi o velikom iznosu, a nema jasnog tabelarnog prikaza utroška tih sredstava?

Vinka Aletović: je postavila vijećničko pitanje da li je planirano osnivanje turističke zajednice u našoj općini, s obzirom da je u junu 2022. godine, usvojen Zakon o turizmu ZDK koji omogućava i osnivanje općinskih turističkih zajednica?

Branko Češljic: je postavio vijećničko pitanje zašto nisu urađene urbanistička i građevinska dozvola za projekt izgradnje vodovodnog sistema za selo Bištrani koji je urađen juna 2021. godine?

Izudin Puščul: je postavio vijećničko pitanje u kojoj fazi realizacije je projekt produženja vodovodne mreže u MZ Dumanac?

Predsjedavajući je konstatovao da su vijećnici: Edin Šljivo, Aldin Šljivo, Amar Selimović, Mejrema Purišević i Adnan Čobo postavili vijećničko pitanje bez korištenja govornice.

Edin Šljivo: je postavio dva vijećnička pitanja. Prvo je šta je sa izgradnjom dječijeg igrališta u Karaulskom Polju, jer je prema njegovim saznanjima MZ Donji Kakanj iznašla lokaciju gdje bi se igralište izgradilo? Drugo je kada će se riješiti pitanje kanalizacione infrastrukture u mjestu Roščevina-Popare zbog čega mještani tog dijela naselja u ljetnom periodu (kad su temperature visoke) trpe jake i neprijatne mirise?

Aldin Šljivo: je postavio vijećničko pitanje u kojoj fazi je asfaltiranje putnog pojasa kroz ski-centar Ponijeri, da li je raspisan tender za izvođenje radova ili potpisan ugovor, te ukoliko jeste koji je rok za izvođenje radova i kada se očekuje realizacija tog projekta?

Amar Selimović: je postavio vijećničko pitanje da li je planirana sječa šume, te u kojem obimu, na području šireg prostora naselja Mijakovići i Dragovići, općina Vareš, a sve zbog činjenice da je jedan od glavnih pritoka rijeke Bukovice upravo Mijakovski potok, te da se sa rijeke Bukovice vodom snabdijeva cca 25.000 stanovnika općine Kakanj?

Mejrema Purišević: je postavila vijećničko pitanje zašto u ulici Osmana Džafića nije izvršeno numerisanje objekata, obzirom da je taj postupak završen na području općine Kakanj?

Adnan Čobo: je postavio vijećničko pitanje da li postoji dokument kojim se definiše strategija razvoja JP „Grijanje“, te da li postoji ikakav termin-plan proširenja mreže daljinskog grijanja na području općine Kakanj, sa navedenim područjima i vremenskim odrednicama kada bi se isto trebalo realizovati?

Vijećničke inicijative

Dževdet Huskić: je pokrenuo dvije vijećničke inicijative. Prva inicijativa da se jačina javne rasvjete i pokrivenost općine javnom rasvjetom prilagode izdvajanjima iz budžeta za ovu namjenu. Imajući u vidu da je kroz „Program utroška namjenskih sredstava za zaštitu okoline Općine Kakanj za 2023. godinu“, „Program utroška sredstava od komunalne naknade za 2023. godinu“ i „Program utroška neraspoređenog dijela namjenskih sredstava od prihoda preduzeća ostvarenih radom termoelektrana, sredstava od prodaje poslovnih prostora i stanova i sredstava od prodaje zemljišta za 2023. godinu“, planirano preko 1,5 miliona KM za rasvjetu na prostoru općine Kakanj, za očekivati je da grad ima mnogo kvalitetniju i bolju osvjetljenost nego što je to slučaj trenutno. Druga inicijativa je za kupovinu zemljišta iza zgrade Općinskog suda u Kaknju, a zbog činjenice da je na čitavom gradskom području evidentan nedostatak parkinga, pa je tako i ispred zgrade Općinskog suda i Policijske stanice u Kaknju. Uz sve, navedena lokacija je na prodaju.

Marcela Ravlija: je pokrenula dvije vijećničke inicijative. Prva se odnosi na izradu Gender akcionog plana Općine Kakanj za 2023-2027, jer smatra da bi Gender akcioni plan Općine Kakanj sa konkretnim mjerama bio okvir za poticanje razvoja lokalnih snaga, ali bi služio i kao odgovor za izazove budućeg razvoja općine u segmentu rodne ravnopravnosti, a uz to bi bio usklađen sa Zakonom o ravnopravnosti spolova, Gender akcionim planom Bosne i Hercegovine (2018-2022) kao i sa drugim strateškim dokumentima na državnom, entitetskom, kantonalnom i lokalnom nivou. Druga inicijativa je za uvrštavanje zvanja „Bachelor logopedije i audiologije“ i „Bachelor specijalne edukacije i rehabilitacije“ na listu deficitarnih zanimanja VSS koja stipendira Općina Kakanj. Inicijativa je iz razloga što je na prostoru općine Kakanj veoma malo stručnjaka navedenih profila zbog čega sugrađani idu u druge gradove na terapiju i to prije svega djeca sa poteškoćama. Prvi koraci da se pomogne djeci i odraslima sa poteškoćama je stavljanje navedenih zanimanja na listu deficitarnih zanimanja, a zatim bi im se omogućilo da rade u svom gradu.

Safet Šahman: je pokrenuo dvije vijećničke inicijative. Prva inicijativa za zamjenu 20 stubova javne rasvjete u podružnici Hodžići, gdje su rasvetna tijela postavljena na stubove kompanije BH Telecom, a pošto su stubovi drveni i loše su ugrađeni, dešavaju se iskrivljenje istih što u konačnici može dovesti do pucanja kablova i nastanka štete na javnoj rasvjeti. Druga inicijativa je za održavanje tematske sjednice Općinskog vijeća Kakanj, a vezano za probleme linijskih prevoza putnika na području općine Kakanj.

Izudin Pušćul: je pokrenuo dvije vijećničke inicijative. Prva inicijativa se odnosi na rekonstrukciju i sanaciju puta od trafostanice RMU „Kakanj“ u Haljinićima do zaseoka Kevilji u MZ Gornja Ričica, a druga za nastavak rekonstrukcije i sanacije puta u MZ Nažbilj (druga dionica).

Predsjedavajući je konstatovao da su vijećnici: Džemal Bećirhidžić, Omer Musić, Mediha Mamela, Branko Češljčić, Adnan Čobo i Amar Selimović podnijeli vijećničke inicijative bez korištenja govornice.

Džemal Bečirhodžić: je pokrenuo vijećničku inicijativu za promjenu naziva ulica u MZ Bukovlje, tačnije u naseljenim mjestima Demiri, Čobe i Bečirhodžići, na način da se u tim mjestima daju nazivi ulica po imenima šehida iz ovih naseljenih mjesta i to: Demir Nerminu, Čobo Maliku i Bečirhodžić Harisu.

Omer Musić: je pokrenuo dvije vijećničke inicijative. Prva inicijativa za saniranje nekoliko rasvjetnih tijela u ulici Željeznička, a druga za uređenje Mosta šehida u ulici Paše Kubata i zamjenu svjetiljki koje se nalaze u sklopu mosta.

Mediha Mamela: je pokrenula vijećničku inicijativu za osnivanje javne ustanove za razvoj i promociju turizma na području općine Kakanj, jer smatram da postoji javni interes za osnivanje ove ustanove.

Branko Češljčić: je pokrenuo dvije vijećničke inicijative. Prva inicijativa je da se u dolini rijeke Bukovice duž makadamskog puta na određenim udaljenostima postave kante za smeće ili manji broj kontejnera za odlaganje i odvoz smeća, a zbog povećanog broj posjetilaca starom gradu Bobovcu. Druga inicijativa se odnosi na popravak odvoda ispod nadvožnjaka u naselju Bjelavići, jer se usljed velikih oborina skuplja voda na cesti koja otežava saobraćaj i poplavi dio ceste.

Adnan Čobo: je pokrenuo dvije vijećničke inicijative. Prva inicijativa je da se svi učenici osnovnih i srednjih škola i redovni studenti koji žive i imaju prebivalište na području Kaknja oslobode plaćanja ski karte na skijalištu Ponijeri u iznosu od 50% na teret poslovanja JU „Kulturno-sportski centar“ Kakanj. Druga inicijativa je da se od školske 2023/2024 godine u Kaknju uvede smjer „Informatika“ kao primarno srednjoškolsko opredjeljenje.

Amar Selimović: je pokrenuo dvije vijećničke inicijative. Prva inicijativa je da se izvrši postavljanje rasvjetnih tijela na potezu od džamije u Bičeru prema naselju Dumanac obzirom da su ispunjeni svi preduslovi za realizaciju posla. Druga inicijativa je za isplatu novčane naknade trojici kakanjaca koji su pružili pomoć stradalima od zemljotresa u Turskoj i to u iznosu minimalno po 1.000 KM za Tokalić Spahiju, Kozlo Enesa i Avdispahić Sabita.

Utvrđivanje dnevnog reda

Predsjedavajući je za 26. redovnu sjednicu predložio dnevni red koji je usaglašen na sjednici Kolegija, a kako nije bilo primjedbi na predloženi dnevni red isti je usvojen sa 24 glasa ZA, bez glasova PROTIV i 3 glasa UZDRŽAN.

Usvojeni dnevni red

1. Prijedlog odluke o izmjenama i dopunama Budžeta Općine Kakanj za 2023. godinu
2. Prijedlog programa utroška namjenskih sredstava za zaštitu okoline Općine Kakanj za 2023. godinu
3. Prijedlog programa utroška sredstava iz Budžeta Općine Kakanj za podsticaj razvoja poduzetništva i obrta za 2023. godinu
4. Prijedlog programa utroška sredstava iz Budžeta Općine Kakanj za podsticaje u poljoprivredi za 2023. godinu
5. Izvještaj o realizaciji Programa utroška sredstava od komunalne naknade za 2022. godinu
6. Prijedlog programa utroška sredstava od komunalne naknade za 2023. godinu
7. Izvještaj o realizaciji Programa utroška sredstava od koncesionih naknada za 2022. godinu
8. Prijedlog programa utroška sredstava od koncesionih naknada za 2023. godinu
9. Izvještaj o realizaciji Plana redovnog održavanja javnih i nerazvrstanih cesta na području općine Kakanj za 2022. godinu
10. Davanje saglasnosti na Plan redovnog održavanja javnih i nerazvrstanih cesta na području općine Kakanj za 2023. godinu
11. Izvještaj o realizaciji Programa utroška neraspoređenog dijela namjenskih sredstava od prihoda preduzeća ostvarenih radom termoelektrana za 2022. godinu, sredstava od prodaje poslovnih prostora i stanova i sredstava od prodaje zemljišta

12. Prijedlog programa utroška neraspoređenog dijela namjenskih sredstava od prihoda preduzeća ostvarenih radom termoelektrana za 2023. godinu, sredstava od prodaje poslovnih prostora i stanova i sredstava od prodaje zemljišta
13. Prijedlog odluke o zagrijavanju stambenog i poslovnog prostora u Kaknju daljinskim grijanjem i Uslovi za isporuku i preuzimanje toplotne energije iz daljinskog grijanja
14. Prijedlog odluke o utvrđivanju cijena usluga grijanja JP „Grijanje“ d.o.o Kakanj
15. Prijedlog rješenja o konačnom imenovanju NO JU Centar za socijalni rad Kakanj
16. Informacija o stanju zaštite od požara i vatrogastva na području općine Kakanj u 2022. godini
17. Inicijativa građana za osnivanje MZ Željeznička stanica
18. Inicijativa građana za izmjenu naziva MZ Podgora u naziv MZ Sopotnica
19. Informacija o radu Udruženja „Razvojni centar općine Kakanj“ za period 03/22-12/22
20. Davanje saglasnosti na Plan i program rada JU Centar za socijalni rad Kakanj sa finansijskim planom za 2023. godinu
21. Izjašnjavaње o Inicijativi vijećnika Fakira Ajdinovića

1. Prijedlog odluke o izmjenama i dopunama Budžeta Općine Kakanj za 2023. godinu

Predlagač: općinski načelnik

Obrađivač: Služba za finansije

Izjavitelj: Džihad Berbić, pomoćnik općinskog načelnika

Džihad Berbić: je predložio dodatnu izmjenu Budžeta, a koja se odnosi na pomoć za obnovu područja pogođenih zemljotresom u Turskoj. Rekao je da je Štab CZ Općine Kakanj donio Odluku da se za tu namjenu iz Budžeta odobri 10 hiljada KM iz namjenskih sredstava za zaštitu okoline, ali su od Federalne uprave CZ dobili obrazloženje da se namjenska sredstva ne mogu uplaćivati kao donacije inostranim vladama. S toga je predložio da se u Budžet uvrsti nova stavka za tu namjenu i da se u adekvatnom iznosu uvećaju ostali prihodi u Budžetu.

U diskusiji nije niko učestvovao i Vijeće je Odluku o izmjenama i dopunama Budžeta Općine Kakanj za 2023. godinu, usvojilo jednoglasno sa 28 glasova ZA.

2. Prijedlog programa utroška namjenskih sredstava za zaštitu okoline Općine Kakanj za 2023. godinu

Predlagač: općinski načelnik

Obrađivač: Služba za privredu, urbanizam i zaštitu okoliša

Izjavitelj: Mirza Fazlić, pomoćnik općinskog načelnika

U diskusiji su učestvovali: Safet Šahman i Marcela Ravlija.

Safet Šahman: je tražio pojašnjenje stavke „Opremanje ambulante Krševac“ iz tabele 2. i konstatovao da je ta stavka prenesena iz prehodne godine, pa je pitao u koju svrhu su planirana ta sredstva i da li će biti utrošena u tekućoj godini.

Marcela Ravlija: se osvrnula na utrošak od preko 2 miliona KM za projekte po predmetnom programu za koje smatra da je vrlo malo projekata koji konkretno utiču na smanjenje zagađenosti zraka (samo dva). Istakla je da programom nisu predviđene subvencije za nabavku toplotnih pumpi, zamjenu kotlova na ugalj, te utopljavanje drugih stambenih objekata. Napomenula je da je NS tri godine podnosila amandman na Budžet Općine za sedmogodišnji plan smanjenja aerozagađenja, koji bi da je prihvaćen već počeo davati rezultate po pitanju zagađenja zraka. Komentarisala je izdvajanje od 360 hiljada KM za ručno i mašinsko pranje i uklanjanje nečistoća sa gradskih i prigradskih saobraćajnica i kazala da su to ogromna sredstva i da to praktično znači da se dnevno izdvaja po hiljadu KM za tu namjenu, odnosno i duplo više, ako se uzme u obzir da se radi o ljetnom održavanju i čišćenju, jer postoji i zimsko održavanje. Na kraju je pohvalila projekat odvoza otpada iz udaljenih MZ što je ocijenila kao značajan korak u smanjenju zagađenosti općine.

Mirza Fazlić (odgovor): je pojasnio da se sredstva za ambulantu Krševac prenose zaključkom na Dom zdravlja, a biće utrošena za opremanje ambulante, za nabavku opreme koja se ocijeni kao prioritetna od strane Doma zdravlja. U vezi diskusije vijećnice Ravlija je rekao da je čišćenje prašine itekako značajan projekat za zaštitu zraka, te je istakao da su svi projekti predviđeni programom ekološki projekti i kao takvi će biti predmet odobravanja i revizije od strane nadležnih ministarstava. Na karaju je pozvao sve vijećnike, ukoliko žele vidjeti gdje su utrošena sredstva iz bilo kojeg projekta, da se obrate u Službu, Zavod ili Vodokom kako bi izvršili uvid u kompletnu dokumentaciju, a sve kako se ne bi iznosile paušalne i neproverene insinucije i dovodio u sumnju način utroška sredstava.

Nakon diskusije Vijeće je usvojilo Program utroška namjenskih sredstava za zaštitu okoline Općine Kakanj za 2023. godinu, sa 20 glasova ZA, 3 glasa PROTIV i 6 glasova UZDRŽAN.

3. Prijedlog programa utroška sredstava iz Budžeta Općine Kakanj za podsticaj razvoja poduzetništva i obrta za 2023. godinu

Predlagač: općinski načelnik

Obradivač: Služba za privredu, urbanizam i zaštitu okoliša

Izjestilac: Mirza Fazlić, pomoćnik općinskog načelnika

U diskusiji su učestvali: Dževdet Huskić i Vinka Aletović.

Dževdet Huskić: je pitao postoje li parametri koji mjere učinke projekta „Pokreni svoj posao“ i da li po pitanju odnosa zaposleni-nezaposleni mijenja statistika u zadnjih 7-8 godina. Rekao je da se od strane općine ulaže ozbiljan novac za povećanje broja zaposlenih, pa je pitao koji su stvarni efekti tog ulaganja.

Vinka Aletović: je pohvalila nastojanja da se kroz projekte predviđene programom poboljša socijalni i ekonomski status žena. Uz to se osvrnula na projekat „Sufinansiranje zapošljavanja osoba sa invaliditetom“ za koji su predviđena sredstva od 6 hiljada KM (za bruto plaću zaposlenog u trajanju od 6 mjeseci), pa je u tom kontekstu predložila povećanje te stavke za dodatnih 6 hiljada KM, kako bi se zaposlila još jedna invalidna osoba, sa prijedlogom da ta sredstva obezbijede sa stavke „Rezervna sredstva“.

Mirza Fazlić (odgovor): je pojasnio su sredstva za zaposlenje invalidne osobe u predviđenom iznosu planirana na osnovu prethodno obavljenog razgovora sa Fondacijom „Muharem Berbić“, jer su oni jedini gdje postoji mogućnost zaposlenja invalidne osobe sa odgovarajućim stepenom invalidnosti. Naglasio je da će dodatna sredstva svakako biti obezbjeđena ukoliko se pojavi mogućnost zaposlenje još jedne invalidne osobe. U vezi statističkih podataka o efektima ulaganja u povećanje broja zaposlenih je rekao da postoje statistički bilteni koji bilježe te podatke. Rekao je da je zabilježen rast broja zaposlenih u 2020., 2021. i 2022. godini (bilo 8.775 sada 8.805 zaposlenih lica) i istovremeno smanjenje broja nezaposlenih (bilo 7.015 sada 6.699 nezaposlenih lica). Napomenuo je da je vrlo značajno imati na umu da je od 2013. godine u Kaknju došlo do gašenja firmi (Rudstroj i GMK), a da je RMU Kakanj smanjio broj zaposlenih za preko 600 radnika, kao i da je TC Kakanj smanjila broj radnika za pola, te da je došlo do smanjenja broja radnika u TE Kakanj. Sve te promjene su na neki način kompenzirane kroz projekte i nova zapošljavanja, pri čemu je kroz projekat „Pokreni svoj posao“ osnovano preko 200 firmi čija je opstojnost oko 70%, iz čega proizilazi da su efekti ulaganja jasno vidljivi. Napomenuo je da nije samo Općina ta koja doprinosi povoljnijem odnosu zaposleni-nezaposleni u posmatranom periodu, ali Općina svojim projektima svakako motiviše lica da pokrenu vlastite biznise.

Nakon diskusije Vijeće je usvojilo Program utroška sredstava iz Budžeta Općine Kakanj za podsticaj razvoja poduzetništva i obrta za 2023. godinu sa 23 glasa ZA, bez glasova PROTIV i 6 glasova UZDRŽAN.

4. Prijedlog programa utroška sredstava iz Budžeta Općine Kakanj za podsticaje u poljoprivredi za 2023. godinu

Predlagač: općinski načelnik

Obradivač: Služba za privredu, urbanizam i zaštitu okoliša

Izjestilac: Mirza Fazlić, pomoćnik općinskog načelnika

U diskusiji nije niko učestvovao i Vijeće je usvojilo Program utroška sredstava iz Budžeta Općine Kakanj za podsticaje u poljoprivredi za 2023. godinu, sa 24 glasa ZA, 2 glasa PROTIV i 1 glas UZDRŽAN.

Predsjedavajući je predložio da se objedini rasprava po tačkama 5. i 6. dnevnog reda, a da se glasanje obavi pojedinačno.

5. Izvještaj o realizaciji Programa utroška sredstava od komunalne naknade za 2022. godinu

6. Prijedlog programa utroška sredstava od komunalne naknade za 2023. godinu

Predlagač: općinski načelnik

Obradivač: Zavod za planiranje i izgradnju općine Kakanj

Izjestilac: Zijad Neimarlija, direktor Zavoda

U diskusiji su učestvovali: Marcela Ravlija, Vinka Aletović, Dževdet Huskić i Edin Šljivo.

Marcela Ravlija: je kazala da ima nejasnoću u vezi izdvajanja iznosa od 10 hiljada KM za montažu i demontažu usporivača brzine, a što se pojavljuje u izvještaju i projeklogu programa. Pitala je koliko se postavlja usporivača i smatra da se za tu namjenu izdvaja značajan iznos sredstava.

Zijad Neimarlija (odgovor): je pojasnio da se u toku godine montira i demontira oko 120 dužnih metara usporivača, od kojih se svaki metar sastoji od tri segmenta koji se vijcima pričvršuju za podlogu. Složio se da trenutno rješenje nije najekonomičnije i kazao da će se u budućnosti nastojati uraditi drugačije rješenje po uzoru na novoizgrađenu saobraćajnicu.

Vinka Aletović: se osvrnula na stavku „Rekonstrukcija ceste u ulici 1. maj – priključna cesta“ i kazala da je razočarana jer se nadala da će njena inicijativa, koju je više puta podnosila, biti uzeta u obzir u predloženom programu, a radi se o rekonstrukciji ceste u naselju Bare i to od raskrsnice prema naselju Plandište.

Dževdet Huskić: je tražio pojašnjenje stavki koje se nalaze u izvještaju i programu gdje se izdvaja preko 700 hiljada KM za stavke „Dio troškova (plate i ostala davanja i materijalni troškovi i usluge)“, pa je pitao zašto stoji riječ „dio“, odnosno dali to znači da ima još tih troškova osim navedenih. Još je pitao za koju namjenu je planiran utrošak 300 hiljada KM za nepredviđene radove na novoj saobraćanici.

Edin Šljivo: je predložio da se pored predviđenih, izdvoji dodatnih 15 hiljada KM za projekat „Led rasvjeta u MZ Brnjic – proširenje“ i da se prebace iz sredstava rezervi.

Zijad Neimarlija (odgovor): je kazao da je opravdano nezadovoljstvo vijećnice Aletović, ali je istakao da postoje prioriteti nad prioritetima, te smatra da je za naselje Bare veći problem sa oborinskim vodama i da su u skladu s tim u programu opredjeljena sredstva za taj projekat. Rekao je da će se nastojati uraditi kvalitetnija sanacija na području o kojem je govorila vijećnica Aletović, a da bi se uradila rekonstrukcija potrebna su veća finansijska sredstva koja se trenutno ne mogu obezbijediti. Po pitanju plata i ostalih davanja za radnike Zavoda je rekao da je za 2023. godinu planirano 685 hiljada KM i dodatnih 30 hiljada KM za ostale materijalne troškove, koje u prošloj godini greškom nisu bile planirane, a troškovi su iznosili oko 700 hiljada. Dodatna sredstva su planirana za pokriće troškova otpremnina zbog odlaska u penziju, isplata za slučaj smrti radnika i članova njihovih porodica i druge materijalne troškove, te da se pokrije dio troškova nastalih po tom osnovu u prethodnoj godini. U vezi prijedloga vijećnika Šljive za dodatna sredstva za rasvjetu u MZ Brnjic je kazao da nije spreman u tom dijelu mijenjati predloženi program, obzirom da su sredstva na stavci „Rezervna sredstva“ planirana za druge namjene.

Dževdet Huskić: je pojasnio da se njegovo pitanje odnosilo na riječ „dio“, što navodi da ima još neki „dio“ kojim se pokrivaju troškovi plata i drugih davanja, a da mu nije bila namjera da ulazi u analitiku utroška sredstava za predmetnu namjenu.

Zijad Neimarlija (odgovor): je dopunio odgovor na pitanje vijećnika Huskića oko plana utroška sredstava za nepredviđene radove na novoizgrađenoj saobraćajnici i kazao da je iznos od 300 hiljada

KM opredjeljen na osnovu procjene nadzornog organa što je potrebno za završetak radova na tom projektu, koja sredstva će biti utrošena nakon što Vijeće usvoji program.

Nakon diskusije Vijeće je usvojilo Zaključak o prihvatanju Izvještaja o realizaciji Programa utroška sredstava od komunalne naknade za 2022. godinu, sa 20 glasova ZA, 4 glasa PROTIV i 5 glasova UZDRŽAN, te je usvojen Programa utroška sredstava od komunalne naknade za 2023. godinu, sa 20 glasova ZA, bez glasova PROTIV i 9 glasova UZDRŽAN.

Predsjedavajući je predložio da se objedini rasprava po tačkama 7. i 8. dnevnog reda, a da se glasanje obavi pojedinačno.

7. Izvještaj o realizaciji Programa utroška sredstava od koncesionih naknada za 2022. godinu

8. Prijedlog programa utroška sredstava od koncesionih naknada za 2023. godinu

Predlagač: općinski načelnik

Obrađivač: Zavod za planiranje i izgradnju općine Kakanj

Izjestilac: Zijad Neimarlija, direktor Zavoda

U diskusiji nije niko učestvovao i Vijeće je usvojilo Zaključak o prihvatanju Izvještaja o realizaciji Programa utroška sredstava od koncesionih naknada za 2022. godinu, sa 20 glasova ZA, bez glasova PROTIV i 8 glasova UZDRŽAN, te je usvojen Program utroška sredstava od koncesionih naknada za 2023. godinu, sa 18 glasova ZA, bez glasova PROTIV i 8 glasova UZDRŽAN.

Predsjedavajući je predložio da se objedini rasprava po tačkama 9. i 10. dnevnog reda, a da se glasanje obavi pojedinačno.

9. Izvještaj o realizaciji Plana redovnog održavanja javnih i nerazvrstanih cesta na području općine Kakanj za 2022. godinu

10. Davanje saglasnosti na Plan redovnog održavanja javnih i nerazvrstanih cesta na području općine Kakanj za 2023. godinu

Predlagač: općinski načelnik

Obrađivač: Zavod za planiranje i izgradnju općine Kakanj

Izjestilac: Zijad Neimarlija, direktor Zavoda

U diskusiji su učestvovao Dževdet Huskić.

Dževdet Huskić: je pohvalio Izvještaj i Plan, tačnije kako su isti pripremljeni i prezentirani, te je rekao da bi izvještaji o programi od svih službi trebali tako izgledati da ne daju prostor za bilo kakve nedoumice.

Nakon diskusije Vijeće je usvojilo Zaključak o prihvatanju Izvještaja o realizaciji Plana redovnog održavanja javnih i nerazvrstanih cesta na području općine Kakanj za 2022. godinu, sa 22 glasa ZA, bez glasova PROTIV, uz 5 glasova UZDRŽAN, te je usvojen Zaključak o davanju saglasnosti na Plan redovnog održavanja javnih i nerazvrstanih cesta na području općine Kakanj za 2023. godinu, sa 20 glasova ZA, bez glasova PROTIV, uz 9 glasova UZDRŽAN.

Predsjedavajući je predložio da se objedini rasprava po tačkama 11. i 12. dnevnog reda, a da se glasanje obavi pojedinačno.

11. Izvještaj o realizaciji Programa utroška neraspoređenog dijela namjenskih sredstava od prihoda preduzeća ostvarenih radom termoelektrana za 2022. godinu, sredstava od prodaje poslovnih prostora i stanova i sredstava od prodaje zemljišta

12. Prijedlog programa utroška neraspoređenog dijela namjenskih sredstava od prihoda preduzeća ostvarenih radom termoelektrana za 2023. godinu, sredstava od prodaje poslovnih prostora i stanova i sredstava od prodaje zemljišta

Predlagač: općinski načelnik

Obradivač: Zavod za planiranje i izgradnju općine Kakanj

Izjavitelj: Zijad Neimarlija, direktor Zavoda

U diskusiji su učestvovali: Safet Šahman, Marcela Ravlija, Sabit Čehajić, Dževdet Huskić, Slaven Katičić.

Safet Šahman: je rekao da je nezadovoljan sredstvima koja se izdvajaju za projekte na području Brnjica, kao i činjenicom da se ti projekti obično ne realizuju tokom godine zbog čega se prenose za narednu godinu. Takav slučaj je i sa projektom „Rekonstrukcija puta u MZ Krševac“ koji nije realizovan u 2022. godini.

Marcela Ravlija: je apelovala da se pretežan dio sredstava po predloženom programu usmjeri prema MZ koje se nalaze u okruženju TE i koje su najugroženije zbog rada TE. Konstatovala je da su u prethodnoj godini samo bila ulaganja u Papratnici, Usijeli i Hrasnom, a da je za 2023. godinu planirana samo „Rekonstrukcija LED rasvjete Vehabi“.

Sabit Čehajić: se složio sa diskusijom vijećnika Šahmana i rekao da su izdvajanja za pojedinačne projekte nedovoljna, zbog čega se ne može završiti ono što je planirano. Još je pitao zašto nije prenesen u 2023. godinu projekat koji je prvobitno bio planiran još 2018. godine i koji nije realizovan u prethodnoj godini, a odnosi se na proširenje rasvjete u naselju Varda.

Dževdet Huskić: je zamolio da se prilikom realizacije projekata vezanih za LED rasvjetu vodi računa o jačini rasvjetnih tijela kako bi ista bude adekvatna, jer osvijetljenost trenutnom rasvjetom u gradu i selima nije zadovoljavajuća. Još se osvrnuo na projekte rekonstrukcije cesta i kazao da ti projekti, a za koje su planirana sredstva od 15 ili 20 hiljada KM, ne mogu kvalitetno da se urade jer je to nedovoljno sredstava za ozbiljne radove.

Slaven Katičić: je rekao da iz diskusije pojedinih vijećnika proizilazi da se neka područja općine zanemaruju ili opstruiraju prilikom realizacije projekata, što je ocijenio nekorektim. Naglasio je da dosta projekata ne bude realizovano iz objektivnih okolnosti ili razloga na koje se nije moglo uticati, ali da je činjenica da su kroz protekle godine značajna sredstva uložena u infrastrukturu svih područja općine. Rekao je da je svjestan senzibiliteta svih vijećnika i da bi svi željeli da se ulaže u područja gdje žive ili odakle potiču, ali da to nije prosto moguće svake budžetske godine i ostvariti.

Zijad Neimarlija (odgovor): je rekao kada se realizuju pojedini projekti pokušavaju se grupisati na način da se u istom periodu na određenom području realizuje više projekata, a radi transporta mehanizacije, pa je tako i sa projektom rekonstrukcije puta u MZ Krševac, te je to jedini razlog zašto isti nije realizovan u 2022. godini. U svakom slučaju taj projekat će biti u prioritetu za realizaciju u tekućoj godini. U vezi diskusije vijećnice Ravlija je rekao da se svakako vodi računa da se dio sredstava po predmetnom programu uloži u MZ koje okružuju TE, ali je podsjetio da taj program obuhvata širi dio sredstava, kao što su sredstva od prodaje poslovnih prostora i stanova i sredstva od prodaje zemljišta. Što se tiče realizacije projekta proširenja rasvjete na Vardi, podsjetio je da je to projekat iz 2018. godine i da firma koja je dobila taj posao ne želi da isti realizuje pod uslovima koji su tada ugovoreni, iz razumljivih razloga poremećaja cijena na tržištu zbog čega je neophodno izdvojiti znatno veća sredstva da bi se taj projekat realizovao. Složio se diskusijom vijećnika Huskića i rekao da ugrađena i rekonstruisana rasvjeta treba da bude kvalitetna u skladu sa studijama i elaboratima urađenim na tu temu. U tom kontekstu je upoznao Vijeće da su u toku aktivnosti sa UNDP gdje se pokušava neki od tih projekata realizovati u saradnji sa njima. Također je upoznao Vijeće da će od ove godine održavanje javne rasvjete biti povjereno JP „Grijanje“ i to čim se završe formalni uslovi oko izmjene registracije i internih akata tog preduzeća. Te usluge će se vršiti prema cjenovniku kojeg usvoji Općinsko vijeće.

Nakon diskusije Vijeće je usvojilo Zaključak o prihvatanju Izvještaja o realizaciji Programa utroška neraspoređenog dijela namjenskih sredstava od prihoda preduzeća ostvarenih radom termoelektrana za 2022. godinu, sredstava od prodaje poslovnih prostora i stanova i sredstava od prodaje zemljišta, sa 20 glasova ZA, bez glasova PROTIV, uz 9 glasova UZDRŽAN, te je usvojen Program utroška neraspoređenog dijela namjenskih sredstava od prihoda preduzeća ostvarenih radom termoelektrana za

2023. godinu, sredstava od prodaje poslovnih prostora i stanova i sredstava od prodaje zemljišta, sa 20 glasova ZA, bez glasova PROTIV i 8 glasova UZDRŽAN.

Predsjedavajući je dao pauzu od 15 minuta na prijedlog kluba NS.

Predsjedavajući je predložio da se objedini rasprava po tačkama 13. i 14. dnevnog reda, a da se glasanje obavi pojedinačno.

13. Prijedlog odluke o zagrijavanju stambenog i poslovnog prostora u Kaknju daljinskim grijanjem i Uslovi za isporuku i preuzimanje toplotne energije iz daljinskog grijanja

14. Prijedlog odluke o utvrđivanju cijena usluga grijanja JP „Grijanje“ d.o.o Kakani

Predlagač: Skupština JP „Grijanje“ d.o.o. Kakanj

Obrađivač: Skupština JP „Grijanje“ d.o.o. Kakanj

Izjavitelj: Muamer Čelebić, direktor i Mirnes Merdić, predsjednik Skupštine JP „Grijanje“ d.o.o. Kakanj

U diskusiji su učestvovali: Marcela Ravlija, Dževdet Huskić, Slaven Katičić, Enver Merdić, Vinka Aletović, Izudin Puščul i Mirsad Tursum.

Marcela Ravlija: se osvrnula na prijedlog odluke o zagrijavanju, konkretno član 18. i predložila da se umanjenjem mjesečnog računa pod uslovima koji su navedeni u članu obuhvate i korisnici kojima se obračun vrši kalorimetrom. Također, predložila je da se privremenim isključenjem omogućiti da korisnici, naročito penzioneri koji žive u velikim kućama, mogu zagrijavati samo dio prostora, odnosno samo neke prostorije, kao i da se omogućiti isključenje iz sistema stanova/kuća koji su prazni.

Dževdet Huskić: je rekao da su trenutne cijene visoke i da ne bi trebalo da se ide u povećanje cijena uzimajući u obzir trenutnu socijalnu situaciju u kojoj se građani nalaze a i obzirom na cijene koje plaćaju u drugim gradovima za druge energente. Dodao je da je na Kolegiju Općinskog vijeća predlagao da se predstavnik JP Elektroprivreda obrati na sjednici i obrazloži poskupljenje. Osvrnuo se na izlaganje direktora u dijelu koji govori o monopolskom odnosu JP EP prema JP „Grijanje“ što je, istakao je, preslikan odnos JP „Grijanje“ prema potrošačima. Iz tog razloga, a i podsjetio je, ranijih negodovanja u vezi važeće Odluke o zagrijavanju, klub vijećnika NS neće podržati ovaj prijedlog. Također, ukoliko se analizira prijedlog odluke o utvrđivanju cijena, doći će se do zaključka da će najveći teret poskupljenja podnijeti upravo građani jer se korekcija cijena odnosi na one koji zagrijavaju privatni prostor. Pozvao je i ostale vijećnice i vijećnike da se uključe u raspravu kako bi zajednički pronašli rješenje a i da se JP „Grijanje“ uključi u rješavanje ovog problema, jer kroz svoje odluke i opredjeljenja Općinsko vijeće daje podršku ovom preduzeću, pa se očekuje i od JP „Grijanje“ konkretniji angažman, npr. u vidu plana restrukturiranja troškova.

Slaven Katičić: je rekao da su vijećnice i vijećnici dobili zaključak sa dužim obrazloženjem koji je osnov za dalje korake JP „Grijanje“ i Općinskog vijeća. Osvrnuo se posebno na dio u uvodnom izlaganju direktora gdje je prenio stav JP EP da sistem daljinskog grijanja nema elemente ekološkog projekta i zaključio da ih ima samo u populističke i političke svrhe. Dodao je da Vijeće treba razmotriti oba ishoda i usvajanja i neusvajanja odluke o utvrđivanju cijena. Istaknuo je da cijena gradskog grijanja nije visoka, uzimajući u obzir sve benefite, posebno kad se uporede ostali energenti i način na koji se griju ostali stanovnici općine te rekao da, ukoliko se cijena grijanja ne poveća, onda je osnivač dužan namiriti te obaveze iz svojih sredstava. Upitao je da li će se subvencionirati grijanje u gradu nauštrb ruralnih sredina tj. zašto bi jedni imali sve pogodnosti, a drugi bili bez njih. Rekao je da će se, ukoliko se cijene grijanja ne povećaju, JP „Grijanje“ dovesti u nepovoljnu situaciju i ugroziti će se njegov opstanak, te da Vijeće treba postupati odgovorno i donositi odluke koje će imati dugoročne rezultate, a ne kratkoročni populizam. Na kraju je dodao da su svi energenti poskupjeli, a da se pri tome nisu čula negodovanja, te da su i načini plaćanja daleko povoljniji onima koji su korisnici gradskog grijanja što samo govori u prilog da se ovakva vrsta poticaja ne treba dati korisnicima gradskog grijanja nauštrb seoskih domaćinstava.

Dževdet Huskić: je upitao predsjedavajućeg gdje je u izlaganju njega i vijećnice Ravlije uočio populizam i rekao da je iz izlaganja predsjedavajućeg evidentno da on ima ozbiljan problem sa ljudima koji koriste gradsko grijanje, te je njegovu diskusiju ocijenio populističkom.

Slaven Katičić: je odgovorio vijećniku Huskiću da smatra populizmom kad neko u ovim okolnostima, kad se govori o poskupljenju, sugerira da grijanje može biti još jeftinije i da je kakanjsko grijanje skuplje od sarajevskog. Dodao je da se istim slijedom može doći do zaključka da onda neko ima nešto protiv stanovnika ruralnih područja jer se na ovaj način oni izostavljaju iz subvencija. Odbacio je tvrdnje da je populizam, izlaganje o dugovanjima u koja JP „Grijanje“ ide, odlaganjem povećanja cijena.

Enver Merdić: je pojasnio način formiranja cijene toplotne energije TE i rekao da cilj nije da se ostvari profit već da se pokriju troškovi koji nastanu njenom proizvodnjom (investicije, električna energija, ugalj, radna snaga). Podsjetio je na raniji angažman i Općinskog vijeća i uprave JP „Grijanje“ što je na kraju dovelo do pozitivnog poslovanja i korektnog odnosa sa JP EP, pa tragom ranijeg iskustva predložio da se ponovo oformi tim koji će zajednički djelovati u iznalaženju prihvatljivijeg rješenja, a da se ishitreno ne ide u povećanje cijena.

Vinka Aletović: se složila sa ranijom diskusijom vijećnice Ravlije i istakla da su se prilikom donošenja odluke o zagrijavanju trebali uključiti i građani tj. krajnji korisnici. U vezi povećanja cijena rekla je da klub vijećnika SDP-a podržava raniju metodologiju obračuna cijena toplotne energije JP EP, te da bi se prihvatljivijim cijenama povećao broj korisnika, a nikad ne treba izgubiti iz vida da TE svojim radom značajno utječe na zdravlje stanovnika općine Kakanj. Istakla je i socijalni impakt koji svako povećanje cijena nosi, te se složila s prijedlogom vijećnika Merdića da se obrazuje ekspertni tim za prevazilaženje ove situacije.

Izudin Puščul: je rekao da je evidentno da JP EP monopolistički pristupa prema JP „Grijanje“ i da sličan tretman ima i prema RMU „Kakanj“. Rekao je da se cijena uglja nije mijenjala što se ne može uzeti kao osnov za povećanje cijena toplotne energije. Osvrnuo se na uvodno izlaganje direktora – dio o prethodnom povećanju 2021. godine kad je JP „Grijanje“ svojim sredstvima uspjelo izmiriti obaveze, a da pri tom nije diralo u cijenu grijanja prema krajnjim korisnicima. Obzirom da je sada povećanje znatno veće, teško je očekivati da će JP „Grijanje“ moći to ponoviti i ovaj put. Predložio je da Općinsko vijeće danas sačini kvalitetan zaključak prema JP EP i Vladi FBiH kako bi se ovaj problem riješio.

Mirsad Tursum: je rekao da je diskusija po ovoj tački dnevnog reda jako kvalitetna i ohrabrujuća, te se složio da populizmu nema mjesta o ovim temama, ali da treba reći da je gradsko stanovništvo više izloženo smogu nego seosko. Istaknuo je socijalnu stranu poskupljenja i dodao da su naročito penzioneri ugroženi, te da ne treba izgubiti iz vida da se ovdje borba vodi sa samovoljom JP EP. Složio se s prijedlogom vijećnika Merdića da se formira ekspertni tim koji će procijeniti po realnim parametrima cijenu toplotne energije.

Enever Merdić: je rekao da nije cilj TE Kakanj, a ni JP EP povećanje cijena toplotne energije u smislu ostvarenja profita, već pokriva opravdanih troškova, te ponovio da se treba formirati tim koji će napraviti metodologiju obračuna cijene toplotne energije i prezentirati je na Općinskom vijeću što će ubuduće onemogućiti ovakve diskusije jer će metodologija biti predvidiva i jasna.

Mirsad Tursum: je rekao da se ne slaže sa diskusijom vijećnika Merdića u smislu opravdavanja povećanja, te dodao da vijećnik Merdić treba zastupati interese građana, a ne uposlenika TE čiji je i sam uposlenik.

Muamer Čelebić: je rekao da JP „Grijanje“ nije imalo uvid u formiranje cijene JP EP, nego da je povećanje cijene obrazloženo poskupljenjem uglja. Pošto je cijena električne energije za domaćinstva ostala ista, postavlja se pitanje zašto ta cijena nije rasla, kao i pitanje zašto se JP EP ne pridržava metodologije u kojoj je cijena toplotne energije bila vezana za cijenu električne energije prema domaćinstvima.

Nakon toga, pročitao je prijedlog zaključka kojim bi se Vijeće očitovalo prema JP EP i Vladi FBiH, a najavio da će JP „Grijanje“ svim pravnim sredstvima pokušati oboriti metodologiju koju je JP EP nametnulo JP „Grijanje“ od februara 2023. godine.

Predsjedavajući: je predložio da se zaključak modificira u smislu da se izbjegnu lična imena nosilaca izvršnih funkcija a da se adresira na institucije vlasti, te da se termini usklade sa nadležnostima koje Općinsko vijeće ima. Pozvao je sve vijećnike da pismeno dostave eventualne zaključke kako bi se na pauzi sačinio jedinstven i usaglašen zaključak za usvajanje.

Dževdet Huskić: je rekao da je zaključak dobio prije nekoliko minuta te da je ostavljen kratak rok za upoznavanje sa njegovim sadržajem. Složio se s predsjedavajućim da ga treba modificirati naročito da to ne bude kontrukcija *Općinsko vijeće izražava nezadovoljstvo spram JP EP, a zbog lošeg poslovnog odnosa* već da se precizira da je to nezadovoljstvo spram jednostrane odluke. Također, smatra da *iznalaženje rješenja mirnim putem* nije adekvatan izraz i da treba sa više pažnje pristupiti izradi zaključka.

Predsjedavajući je dao pauzu od 15 minuta radi usaglašavanja stavova klubova po ovim tačkama dnevnog reda.

Nakon pauze predsjedavajući je dao na glasanje Odluku o zagrijavanju stambenog i poslovnog prostora u Kaknju daljinskim grijanjem sa Uslovima za isporuku i preuzimanje toplotne energije iz daljinskog grijanja, što je Vijeće usvojilo sa 18 glasova ZA, 5 glasova PROTIV i 2 glasa UZDRŽAN, nakon čega se pristupio glasanju o zaključcima sa sastanka predsjednika klubova i to: Zaključak o odgodi izjašnjenje Općinskog vijeća po tački dnevnog reda „Prijedlog odluke o utvrđivanju cijena usluga grijanja JP „Grijanje“ d.o.o. Kakanj“, na period do 30 dana, što je Vijeće usvojilo sa jednoglasno sa 27 glasova ZA, zatim Zaključak o formiranju pregovaračkog tim Općine Kakanj za učešće u pregovorima sa JP Elektroprivreda BiH d.d. Sarajevo, s ciljem iznalaženja povoljnije metodologije za utvrđivanje cijene toplotne energije iz Podružnice Termoelektrana „Kakanj“, a koju u sistem daljinskog grijanja distribuira JP „Grijanje“ d.o.o. Kakanj, u sastavu: Mirnes Bajtarević – općinski načelnik, Mirza Fazlić – šef Službe za privredu, urbanizam i zaštitu okoline, Muamer Čelebić – direktor JP „Grijanje“ d.o.o. Kakanj, Slaven Katičić – predsjedavajući Općinskog vijeća Kakanj, Mirsad Tursum – zamjenik predsjedavajućeg Općinskog vijeća Kakanj, Vinka Aletović – vijećnica u Općinskom vijeću Kakanj, Dževdet Huskić – vijećnik u Općinskom vijeću Kakanj, što je usvojeno sa 23 glasa ZA, bez glasova PROTIV, uz 3 glasa UZDRŽAN, te Zaključak kojim Općinsko vijeće Kakanj izražava nezadovoljstvo zbog narušenog poslovnog odnosa između JP Elektroprivreda BiH d.d. Sarajevo i JP „Grijanje“ d.o.o. Kakanj, te poziva premijera Vlade Federacije BiH i ministra Federalnog ministarstva energije, rudarstva i industrije, da se hitno uključe u rješavanje problema jednostranog i neosnovanog povećanja cijene toplotne energije od strane JP Elektroprivreda BiH d.d. Sarajevo, kao prodavca prema JP „Grijanje“ d.o.o. Kakanj, kao kupcu, a kako bi se nastali spor riješio bez daljnjih negativnih posljedica po oba javna preduzeća, što je usvojeno sa 27 glasa ZA, bez glasova PROTIV, uz 1 glas UZDRŽAN.

15. Prijedlog rješenja o konačnom imenovanju NO JU Centar za socijalni rad Kakanj

Predlagač: Komisija za izbor u regulirane organe

Obrađivač: Komisija za izbor u regulirane organe

Izjavitelj: Amar Selimović, član Komisije

Amar Selimović: je u ime Komisije za izbor u regulirane organe predložio da se u NO JU Centar za socijalni rad Kakanj, imenuju: Emir Šljivo – predsjednik, Ema Petrović – član i Eldina Kovač – član.

U diskusiji nije niko učestvovao te je Vijeće usvojilo Rješenje o konačnom imenovanju NO JU Centar za socijalni rad Kakanj u sastavu: Emir Šljivo – predsjednik, Ema Petrović – član i Eldina Kovač – član, sa 18 glasova ZA, bez glasova PROTIV i 5 glasova UZDRŽAN.

16. Informacija o stanju zaštite od požara i vatrogastva na području općine Kakanj u 2022. godini

Predlagač: općinski načelnik

Obrađivač: Služba civilne zaštite

Izjavitelj: Nurudin Hrusto, pomoćnik općinskog načelnika

U diskusiji nije niko učestvovao i Vijeće je sa 22 glasa ZA, bez glasova PROTIV i 3 glasa UZDRŽAN usvojilo Zaključak o primanju k znanju Informacije o stanju zaštite od požara i vatrogastva na području općine Kakanj u 2022. godini.

17. Inicijativa građana za osnivanje MZ Željeznička stanica

Predlagač: općinski načelnik

Obrađivač: Služba za opću upravu, radne i zajedničke poslove, lokalnu samoupravu i mjesne zajednice

Izjavitelj: Bahrudin Arnaut, pomoćnik općinskog načelnika

U diskusiji je učestvovala Vinka Aletović.

Vinka Aletović: je podsjetila da je po upitima građana iz ove MZ na prošloj sjednici postavila vijećničko pitanje zašto se ova tačka nije našla na razmatranju Vijeća ranije, obzirom da su sve prethodne procedure provedene. S tim u vezi, zahvalila se na brznoj realizaciji njenog vijećničkog pitanja.

Nakon diskusije Vijeće je jednoglasno sa 26 glasova ZA usvojilo Zaključak o prihvatanju inicijative građana za osnivanje MZ Željeznička stanica.

18. Inicijativa građana za izmjenu naziva MZ Podgora u naziv MZ Sopotnica

Predlagač: općinski načelnik

Obrađivač: Služba za opću upravu, radne i zajedničke poslove, lokalnu samoupravu i mjesne zajednice

Izjavitelj: Bahrudin Arnaut, pomoćnik općinskog načelnika

U diskusiji nije niko učestvovao i Vijeće je jednoglasno sa 26 glasova ZA usvojilo Odluku o promjeni naziva MZ Podgora u naziv MZ Sopotnica.

19. Informacija o radu Udruženja „Razvojni centar općine Kakanj“ za period 03/22-12/22

Predlagač: Udruženje „Razvojni centar općine Kakanj“

Obrađivač: Udruženje „Razvojni centar općine Kakanj“

Izjavitelj: Aldin Čatić, direktor Udruženja

U diskusiji nije niko učestvovao i Vijeće je Informaciju o radu Udruženja „Razvojni centar općine Kakanj“ za period 03/22-12/22 primilo k znanju sa 21 glasom ZA, bez glasova PROTIV i 5 glasova UZDRŽAN.

20. Davanje saglasnosti na Plan i program rada JU Centar za socijalni rad Kakanj sa finansijskim planom za 2023. godinu

Predlagač: UO JU Centar za socijalni rad Kakanj

Obrađivač: UO JU Centar za socijalni rad Kakanj

Izjavitelj: Fakir Ajdinović, direktor i Samir Husika, predsjednik UO JU Centar za socijalni rad Kakanj

U diskusiji nije niko učestvovao i Vijeće je usvojilo Zaključak o davanju saglasnosti na Plan i program rada JU Centar za socijalni rad Kakanj sa finansijskim planom za 2023. godinu, sa 17 glasova ZA, bez glasova PROTIV i 8 glasova UZDRŽAN.

21. Izjašnjavanje o Inicijativi vijećnika Fakira Aidinovića

Predlagač: Kolegij Općinskog vijeća

Obrađivač: Stručna služba za poslove Općinskog vijeća

U diskusiji su učestvovali: Mujo Fafulić i Sabit Čehajić.

Mujo Fafulić: je rekao da su nakande jako male i da bi bilo realno da one budu minimalno 100 KM što bi onda imalo za rezultat aktivnije učešće i angažman tih lica.

Sabit Čehajić: je predložio da se izjednače nakande UO i NO JU „Gradska biblioteka“ i JU KSC sa UO i NO JU Centar za socijalni rad.

Predsjedavajući: je predložio da se zaduži Stručna služba Općinskog vijeća da pripremi prijedlog odluke, da Služba za finansije dā mišljenje, te da svi klubovi svoje prijedloge dostave u Stručnu službu Općinskog vijeća. Tako bi se svi prijedlozi našli pred Kolegijem Općinskog vijeća koji bi bio predlagач ove tačke na nekoj od narednih sjednica Općinskog vijeća.

Nakon diskusije Vijeće je prihvatilo Inicijativu vijećnika Fakira Ajdinovića za izmjenu Odluke o utvrđivanju naknada članovima upravnih i nadzornih odbora javnih ustanova u dijelu koji se odnosi na visinu naknade za predsjednike i članove upravnih i nadzornih odbora, sa 17 glasova ZA, 1 glas PROTIV i 8 glasova UZDRŽAN, te je usvojen Zaključak kojim se zadužuje Stručna službu za poslove Općinskog vijeća da pripremi prijedlog nove odluke o utvrđivanju naknada članovima upravnih i nadzornih odbora javnih ustanova čiji je osnivač Općinsko vijeće Kakanj, sa 20 glasova ZA, bez glasova PROTIV, uz 7 glasova UZDRŽAN.

Predsjedavajući je u svoje i ime Vijeća čestitao 1. mart – Dan nezavisnosti BiH i 8. mart – Međunarodni dan žena.

Predsjedavajući je zaključio rad 26. redovne sjednice Općinskog vijeća u 13:55 sati.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR
OPĆINSKOG VIJEĆA**
Ferdo Mijač

**PREDSJEDAVAJUĆI
OPĆINSKOG VIJEĆA**
Slaven Katičić